

DÍDZA'DO' BUROPI BUZÚAJĚ' PEDRO

Pedro rugapě' Dios nupa ta'dá' Cristo

1 ¹ Neda', Simón Pedro, naca' huen dxin queë' Jesucristo, en gubáz nasól-lě'ě Lě'. Rugapa' Dios libí'ili', réajlě'ěli'-ně' Jesús. Lébisö ca nazáca'gaca yöl-la' réajlě' queé'li' Lě', en yöl-la' réajlě' queé'tu' Lě'. Dios beně' ga réajlě'ěli' Lě' tu' naca cazě' tsahui', en tu' náquiě' ca' Xanru' Jesucristo, Nu na' rusölá rě'u, tsahui'. ² Rinábida'-ně' Dios guně' ga gata' queé'li' idútě le ruzá' ládxě'ě queé'ru', en guně' ga soa dxi icja ládxi'do'oli' tu' núnbě'ěli'-ně' Dios, enca' Xanru' Jesús.

Le nácgaca nupa ta'yéajlě' Cristo

³ Lu yöl-la' huáca zxön queë', Dios chibenně' queé'ru' yúgu'tě le riquíniru' para gata' queé'ru' yöl-la' na'bán idú, en para gácaru' ba'a ladxi', tu' núnbě'ěru' Nu na' bulidza rě'u para gata' queé'ru' yöl-la' zxön queë', en le naca tsahui' queë'. ⁴ Tu' runě' caní, beně' ga gaca uzí'iru' xibé yugu' le zxön, en le naca tsahui' guzxí' lu ně'ě gunně' queé'ru', ate' tu' naca caní nuláru' lu le ruá' dö' raca yödzölió ni tu' ta'zě' ládxi'gaca bönachi le cabí naca tsahui'. Nuláru' para gácaru' ca náquiě' Lě' cazě' Dios. ⁵ Que lě ni na':

Channö réajlě'ěli' Cristo,

guli'güí' ládxi'li' gácali' dxi'i ladxi'.

Channö chinácali' dxi'i ladxi',

guli'güí' ládxi'li' gata' ca' queé'li' yöl-la' rácada'.

⁶ Channö nápalí' yöl-la' rácada',

guli'güí' ládxi'li' inná be'e cuinli'.

Channö rinná be'e cuinli',

guli'cöza zxön ladxi'.

Channö ribózáli' zxön ladxi',

guli'sóa ba'a ladxi'.

⁷ Channö zóali' ba'a ladxi',

guli'dxí'i luzá'ali'.

Channö nadxí'ili' luzá'ali',

guli'dxí'i ca' yúgu'tě bönachi.

⁸ Channö caní runli', en zeaj rácarö idú ca runli' caní, lě ni gun ga biti' gaca nítisö yöl-la' réajlě' queé'li' Lě', ate' tseaj gácarö idú ca núnbě'ěli'-ně' Xanru' Jesucristo. ⁹ Nu bönni' biti' ruí'i ládxě'ě guně' caní, náquiě' ca tu bönni' nachul-la' nanítiě', tu' chizá' ral-la ládxě'ě buně' Cristo lě' tsahui', en bugúě' yugu' dul-la' gubáguě'ě zí'atělö. ¹⁰ Que lě ni na', böchi' luzá'ado', ral-la' güí'itěrö ládxi'li' guéquibe'eli' bulidzě' Dios libí'ili', en guró cazě' libí'ili'. Channö gunli' caní, biti' ca' ichixi inígüili'.

¹¹ Caní gaca, idú ládxë'ë Dios gúnнасë' queé'li' lataj tsázali' ga inná bé'tica'së' Xanru' Jesucristo, Nu rusölá rë'u.

¹² Que lë ni na' gúntica'sa' ga tsöjné'li' yugu' lë ni sal-la' chinóz quézili' le, en rugunli' dxin le naca idútë li na' chiguzxí' lu ná'ali'.

¹³ Runi neda' ral-la' usubana' ládxí'li' ca nácagaca lë ni tsanni ni zoa' nabana'. ¹⁴ Ral-la' guna' caní tu' nözda' si' gátia'. Xanru' Jesucristo chigudxi cazë' neda' gaca caní quia'. ¹⁵ Que lë ni na' ruí'ida' ládxa'a guna' ga tsöjné'tica'sili' yugu' lë ni tödi gátia'.

Nupa bila'lé'e yöl-la' zxön queë' Cristo

¹⁶ Biti' bé'lentu' libí'ili' tu didza' ridasö lu yöl-la' sina' queétu', cate' buzéajni'itu' libí'ili' ca ral-la' idxín dza huödë' Xanru' Jesucristo, napë' yöl-la' unná bë' zxön. Netu' bilé'e quézitu' yöl-la' zxön queë'. ¹⁷ Bilé'etu' Lë' cate' Xúziru' Dios benë' Lë' bal, en bë'ë Lë' yöl-la' zxön, ate' biyón chi'ë Dios, le birúaj lataj bení' queë', cate' gunné': "Bönni' ni náquië' Zxí'ina'. Nadxí'ida' Lë', en raza ládxa'a Lë'." ¹⁸ Netu' biyón quézitu' chi'ë na' le birúaj yehua' yubá cate' ni' guzóalentu'-në' Xanru' lu guí'a lá'ayi na'.

¹⁹ Lë na' guca, naca bë'da' zeaj nácaté didza' gulu'ë yugu' bönni' uláz queë' Dios, ate' ral-la' güí'i ládxí'li' didza' na', tu' naca ca tu guí' ruzení' tu ga naca chul-la ga idxintë dza uzení' lu icja ládxi'do'oli' Nu na' naca ca böla'j hui sila queéru'. ²⁰ Lë ni runda' bayudxi tséajni'ili': Cuntu nu bönni', rácasö queë' bití' gaca tséajni'inë' didza' bë'ë tu bönni' uláz queë' Dios. ²¹ Yugu' didza' gulu'ë yugu' bönni' uláz queë' Dios bití' ca' gulu'ë tu' gulé'ëni quézinë', pero gulu'ë didza' uláz queë' Dios le guchízië' Dios Bö' Lá'ayi icja ládxi'do'gaquië'.

Ca nácagaca nupa tu'sédinë' le cabí nácaté

2 ¹ Yugu' bönni' ta'zí' yë'ë gula'cuá'lenë' bönachi Israel, en gula'nnë' nácagaquië' bönni' tu'ë didza' uláz queë' Dios. Lësca' caní yugu' bönni' ila'zí' yë'ë ila'cuá'lenë' libí'ili', en ulu'sédinë' libí'ili' le cabí nácaté. Lu yöl-la' sina' quégaquië' ulu'sédinë' libí'ili' xibá quégacasë' le gun ga soa bönadxi queé'li' ucá'anali' le naca idútë li. Ila'dá'baguë'ë ca' Xanru', Nu busölá rë'u. Le ilunë' gun ga usunítië' Dios légaquië'. ² Zianli' libí'ili' gunli' légaquië' tsözxón lu le ruá' dö' ilunë', ate' tu' gunli' bál-lali' caní ila'nnë' xihui' bönachi que didza' dxi'a le naca idútë li. ³ Lu yöl-la' ruhuidi' quégaquië' ulu'sédinë' libí'ili' le cabí nácaté, para gata' quégaquië' dumí queé'li'. Chinarugu quégaquië' bönni' ni, ate' naca löza ila'nítië' tsaz.

⁴ Dios bití' buniti lahuë' yugu' gubáz lá'ayi queë' na' gulunë' dul-la', pero gurú'unë' légaquië' lataj chul-la. Nága'gaquië' du guíë ga naca chul-la na', ga na' ta'bözë' dza usiúdxë' Dios légaquië'. ⁵ Lësca' caní, bití' buniti lahuë' bönachi gula'cuá' dza ni'te cate' gusól-lë'ë nisa guiój le

busuniti yödzülió le beti bönachi nátagaca xihui', pero busölé' Noé lu nisa na', bönni' ni' bené' libán que le naca tsahui'. Dios busölé' ca' ia'gadxi di'a dza queé' Noé na' lu nisa. ⁶ Lésca' caní, Dios guchúguié' quétagaca bönachi gula'cuá' yödzü Sodoma, en yödzü Gomorra. Busunítié' léguequi lu guí', ate' bulu'huóaca dö. Le guca quéguequi naca tu le ruluí'i le run gadxi nupa tua' dö'. ⁷ Cate' busunítié' yugu' yödzü na', Dios busölé' Lot, tu bönni' tsahui', lu guí' na'. Buí'inida' ládxé' Lot cate' bilé'ené' le xihui' gulún bönachi tuá' dö' na'. ⁸ Caní guca, tu' guzóalené' bönni' tsahui' na' léguequi, ate' bilé'ené', en biyönné' le ruá' dö' na' gulúngaca, ate' tu' gúquié' tsahui' gusébi ládxé' yúgu'té dza ni'a que yugu' le cabí naca tsahui' gulúngaca. ⁹ Caní naca, Xanru' nóziné' usölé' nupa na' tadxi Lè' lu na' nu run ga tsázagaca bönachi nöza dul-la', pero nucózé' xíguia' guné' nupa bití' nátagaca tsahui' ga idxinró dza ichúguié' quéguequi ila'niti tsaz.

¹⁰ Ichúguda'aró quégaquié' bönni' ni tuné' yugu' le ta'zé ládxé' le ruá' dö', en ta'dá'baguié' yöl-la' unná bé' queé' Xanru'. Nátagaquié' rugu ladxi', en zidi ladxi'. Bití' tádxiné' tu'lidza ditjé' gubáz lá'ayi ta'dé' lu bení'. ¹¹ Gubáz lá'ayi na' nápagacatère' yöl-la' unná bé', en yöl-la' huáca ca yugu' bönni' na', pero gubáz lá'ayi na' bití' tu'huázxjané' nu ulu'zéguié' didza' lahué' Xanru'.

¹² Yugu' bönni' ni nátagaquié' ca böa' guixi', bití' bi ta'yéajni'iba', pero náltagacaba' para nu sön létagacaba', en guti létagacaba'. Ta'nné xihué' que le cabí ta'yéajni'iné', ate' ila'nítié' tsaz ca raca quétagacaba' böa' guixi' na'. ¹³ Dios ubi'é quégaquié' le ila'guí'i ila'záqué'è, tu' bulu'saca' zi'é bönachi. Téquiné' naca xibágaquié' tu'zi'é xibé le raca na'a dza. Nátagaquié' ca tu hué' nudzu', en tu le run ditaj cate' ni' tahué' tsözxón len libí'ili', ate' tu'dzéjané' tu' ta'zí' yé'ené' libí'ili'.

¹⁴ Lu yöl-la' rizé ladxi' quégaquié' le ruá' dö' tu'yúé'-nu yugu' nigula. Bití' nacu'é dxisö túngaquié' dul-la'. Túngaquié' ga ta'chixi ta'nigui nupa bití' nátagaca tsutsu ca ta'yéajlé' Cristo. Ta'guílatica'sé' yugu' le tu'huídi'né'. Dios chinuchúguié' quégaquié' ilátigaquié'. ¹⁵ Bulu'cá'ané' le naca idúté li, ate' nachul-la nanítigaquié'. Tuné' ca bené' Balaam, zxí'iné' Beor, bönni' ni' bidxí'iné' dumí, ate' bené' le ruá' dö' tu' nazxjé'. ¹⁶ Dios buzené' le bach Balaam na' tu' bené' le ruá' dö' na'. Tuba' búrrodo' bé'lenba' lè' didza' ca na' tuí'i didza' bönachi, ate' buzága'ba' xinözé' Balaam ga na' sa'yéajé' lu yöl-la' ridá'baga' queé'.

¹⁷ Nátagaquié' bönni' ni ca tu buduá' chibuí'i nisa que, enca' ca tu böaj le riché' bö' budunu'. Chinabá'a xilátjagaquié' lataj chul-la. ¹⁸ Caní nátagaquié' tu' tu'é didza' yugu' le zxön lu yöl-la' bití' bi nözi quégaquié', en tu'guné' dxin yugu' le ta'zé ládxigaca bönachi le ruá' dö', en tuné' ga ta'chixi ta'nigui nupa si' bulu'lá ladaj nupa nátagaca chul-la niti. ¹⁹ Té' bönachi ila'deli' yöl-la' rusölá, pero létagaca cazé' nadzúngaquié', en tuné' bayudxi le ruá' dö'. Nadzúngaquié' yúgu'té

bönni' lu na' bi rinná be'e icja ládxi'do'gaquië'. ²⁰ Channö bulu'lé' lu le cabí naca tsahui' nacuá' yödzölió ni tu' gulúnbë'ë Xanru' Jesucristo, Nu rusölá rë'u, ate' ní'irö ta'röli le cabí naca tsahui' na' légaquië' leyúbölö, en ta'nná be'e légaquië', le nácatë nabága'gacatërë' xíguia' ga røjsetë ca le gula'báguë'ë zí'alö. ²¹ Dxí'arö gaca quégaquië' la'tu' catu caz ilúnbë'ë Nu ruzóa rë'u nöza tsahui' ca le gaca quégaquië' channö gulúnbë'ë Lë', ate' ní'irö bulu'cá'anë' xibá lá'ayi bë'ë Dios quégaquië'. ²² Chibudxín quégaquië' didza' na' rnna:

Ruhuécjaba' bö'cu', ruhuöáguba' le si' gúbaba'.

Ruyázaba' cuchi na' si' gudíbiru'-ba' lu guna'.

Naca löza huödë' Xanru'

3 ¹ Didza' ni naca le buropi ruzúaja' queéli' lu guichi, böchi' luzá'ado'. Lu irópatë guichi na' ruí'i ládxa'a usubana' ládxi'li' ca nácagaca lë ni. ² Guli'tsöjné yugu' didza' gulu'ë bönni' queë' Dios zí'atëlö, ca gulu'ë didza' uláz queë'. Guli'tsöjné ca' xibá na' Xanru', Nu rusölá rë'u, gunná bé'enë' rë'u, lë na' bulu'sédinë' bönni' gubáz nasól-lë'ë Lë' libí'ili'.

³ Ral-la' tsöjnéli' lë ni naca lo. Dza tsöjsétëgaca ulu'luí'i lahuë' bönni' ilunë' le ta'zë ládxe'ë le ruá' dö'. ⁴ Ulu'titjë', ila'nnë': "¿Gazxi caz lë na' guzxí' lu në'ë Cristo? Gunnë': Huöda' leyúbölö. Dza ni'te cate' gulátië' xuz xtó'oru', yúgu'të raca tuz ca guca cate' gusí lo rata' yödzölió ga ridxintë na'a dza." ⁵ Tu'zöë' tsölá'alö le guca dza ni'te. Bë'ë didza' Dios, ate' gulata' lúzxiba, en luyú. Birúaj luyú na' lu nisa ate' zoa gatsaj láhui'lö nisa. ⁶ Len nisa ca' busunítië' Dios yödzölió dza ni'te cate' ni' gusól-lë'ë nisa guió'j le beti yugu' bönachi dul-la'. ⁷ Lúzxiba, en yödzölió ni le nacuá' na'a dza, Dios nucu'ë léguequi ga idxinrö dza usunítië' léguequi lu guí'. Caní gaca tu' gunné' caní Dios caz. Uzégui'ë léguequi dza ni' ichúguië' quégaca bönachi biti' nácagaca tsahui' gátigaca.

⁸ Biti' gal-la ládxi'li' lë ni, böchi' luzá'ado'. Tu dza naca queë' Xanru' ca zían gayuá' iz, ate' zían gayuá' iz nácagaca queë' ca tu dza. ⁹ Biti' ridzenë' Xanru' gunë' le guzxí' lu në'ë gunë'. Téquiguequi bal-la bönachi ridzenë', pero ribözë' zxön ladxi', en ruá' rilenë' rë'u tu' cabí ré'ënë' initi nitú bönachi, pero ré'ënë' ulu'bí'i ládxi'gaca yúgu'të bönachi.

¹⁰ Tsárido'os idxín dza huödë' Xanru' ca ridxinë' tu bönni' gubán chi'i dzó'ölö. Lu dza na' huadödi que lúzxiba len tu bö zxön. Ila'niti yúgu'të le nacuá' lu guí' zxön. Ila'yegui yödzölió ni, en le nacuá' yödzölió ni.

¹¹ Channö caní gaca, ila'niti yúgu'të lë ni, ¿bizxi caz ral-la' gunli'? Ral-la' gácali' ba'a ladxi', en udödi cuinli' lu në'ë Dios. ¹² Ral-la' cózali' dza huödë' Xanru', en güí'i ládxi'li' gunli' ga idxinrö bayón dza ni' cate' initi lúzxiba, ate' ila'niti yúgu'të le nacuá' ni lu guí'. ¹³ Caní gaca, pero rë'u ribózaru' le guzxí' lu në'ë Dios. Gunë' tu lúzxiba cubi, en tu luyú cubi ga ni' soa le naca tsahui'.

¹⁴ Que lë ni na', böchi' luzá'ado', tsanni ni ribózáli' yugu' lë ni, guli'güí' ládxi'li' gácali' idú tsahui' lahuë' Dios, ate' gunli' ga cuntú nu bi gaca inné queéli', en cózáli' dxí'ado' cate' idxinrö dza ni'. ¹⁵ Ral-la' inózili' ribözë' Dios zxön ladxi' para gata' quégaca bönachi lataj ulu'lágaca, ca na' gunné' ca' böchi'ru' Pablo. Buzúajë' queéli' lu guichi, zóalen lë' yöl-la' réajni'i na' bënë Xanru' queë'. ¹⁶ Yúgu'të lu guichi ruzúajë', ru'ë didza' ca nácagaca lë ni, sal-la' nútsa'gaca ca' léguequi yugu' didza' nácagaca böniga tséajni'iru'. Yugu' didza' caní tu'chíxinë' bönni' bití' nózguequinë', en bönni' bití' naca idú ládxi'gaquië'. Lësca' caní tunë' quégaca ia'bal-la didza' nazúajgaca lu guichi lá'ayi, le gun ga usunítië' Dios légaquië'.

¹⁷ Chinóz quézili' lë ni, böchi' luzá'ado'. Que lë ni na' guli'gún chí'i cuinli', para cabí ila'zí' ye'e bönachi bití' nácagaca tsahui' libí'ili', en para cabí ilún ga tseaj bö' icja ládxi'do'oli' ca réajlë'ëli' Cristo.

¹⁸ Guli'güí' ládxi'li' gácarö idú ca núnbë'ëli'-në' Xanru' Jesucristo, Nu rusölá rë'u, ate' ruzí'ili' xibé'. iYöl-la' ba Lë' na'a dza, en yúgu'të dza zá'gaca! iCa' gaca!